

**Regional News Unit AIR Aizawl
Saturday, March 16, 2024**

Time - 7:30 -7:40Hrs

REGIONAL NEWS BULLETIN

HEADLINES (MORNING)

- **Mizoram Samagra Shiksha hnuaiia zirnaa hnathawh leh hmalak dan vilna leh thlithlaina 'Vidya Samiksha Kendra' hawn a ni.**
- **LADC CEM ban hnuah LADC enkawltur atan Lawngtlai DC ruat a ni.**
- **Union Minister for Petroleum & Natural Gas, Hardeep Singh Puri chuan lirthei hman tur tuialhthei sangbawl danglam ethanol 100 chu nimin khan a tlangzarh.**



VSK

Mizoram Samagra Shiksha hnuaiia zirnaa hnathawh leh hmalak dan vilna leh thlithlaina 'Vidya Samiksha Kendra' (VSK) chu Aizawla School Education Complex-ah School Education Minister Dr. Vanlalhlana'n nimin khan a hawng.

Hawna thusawiin Dr. Vanlalhlana chuan state danga a lo hmuh tawh a rualawh ruk em em zirna kawnga hnathawh leh hmalak dan vilna leh thlithlaina 'Vidya Samiksha Kendra' hawn a lo ni thei ta chu lawmawm a tih thu a sawi a. Hmun khat atanga School-a zirlai leh zirtirtute dinhmun thar lam ber ber te, zirtirtu awm that leh chhiatna te, naupang tlem leh tamna te, sorkarin sikula hna a thawk chi hrang hrang te awlsam taka hmuh zung zung theihna tur a awm ta hi a lawmawm a, zirna hnathawh chi hrang hrang vil leh thlithlai theihna, hmuh reng theiha a awm tur hi a lawmawm hle a ni a ti. Hetiang hmanraw tha hi Mizoram zirna atan kailawn thar a nih thu leh tangkai taka hman a nih a beisei thu a sawi.

VSK hi zirna kawnga hnathawh leh hmalakna chi hrang hrangte hmun khat atanga vilna leh thlirna a ni a, zirtirna hmanrua chi hrang hrang sikulin a neih library te, ramp te, toilet te, tui thianghlim in turte leh zirna lama data chi hrang hrang en theihna tur a ni. Hemi atan hian khawl pawimawh chi hrang hrang hman a ni a, VSK atan Ministry of Education atangin vbch 3 hmuh a ni.

Mizoram VSK hi zirna kawnga hmalakna chi hrang hrang - School Management system te, intervention hrang hrang thlir zuina atan te, zirlaite dinhmun tehna atan te, zirna dinhmun bihchianna atan te, sikul leh zirlai dinhmun tarlan nan te, School grading system te leh Financial management system atan te hman tum a ni.

VSK hawnaah hian Minister bakah School Education Department Secretary Pi Lalzarmawii, Director Pu Lalsangliana, MBSE chairman Pu JH Zoremthanga, SCERT Director Pi Zohmingliani leh School Education officer te, State Project Office Samagra Shiksha Officer te an tel a ni.



CM

Chief Minister Pu Lalduhoman Mizoram ralmuanna bul chu ram leh khawtlang dan mipuiten an zawm that vang leh inzahtawn taka an chen ho vang a ni a ti a, State pawn atanga lo lutte pawhin hei an hriat a ngai a, dan te tha takin zawm se a ti.

He thu hi nimina Champhai District in kum 25 a tlin, Silver Jubilee lawmnaah sawiin Pu Lalduhoma chuan Champhai District hmasawinna atana sorkar hmalakna te a tarlang a, Champhai district chuan khualzin hip theihna remchang a ngah a, sawrkar laipui Scheme – Swadesh Darshan 2.0 kalpui nan Aizawl district leh Champhai District te thlan an ni a ti.

Zirna chungchang a ngaihpawimawh thu tarlangin Chief Minister chuan Thangthar tha zawk din tura tih makmawh hmasa chu zirna tha neih a ni a, thalaite hi zirna tha ber an pek chuan khua leh tui tha ber an chherchhuak dawn tihna a ni a ti a, a kaihhruai sawrkar in tun sawrkar kumah Bana Kaih Hand Holding Policy kalpui nan budget ah vbc 200 crore a dah a, hei hi a hmahruai mai a la ni, a ti. He Policy in a tum ber chu khua leh tui tupawh, eizawna khawp theihna leh thiamna nei, hmalakna tur hriate an bana kaia dinchhuahtir a ni a ti bawk.

Champhai District Silver Jubilee lawmnaah hian Adviser to CM Pu TBC Lalvenchhunga, Adviser to CM Pu H.Ginzalala, Champhai North bialtu MLA ni bawk, Lt.Col.Lalhmingthanga Champhai South bialtu MLA bakah Pu Ramthanmawia, East tuipui bialtu MLA ten Chief Minister hi an tawiawm a ni.

<><><>

LADC

Lai Autonomous District Council a Chief Executive Member Pu V.Zirsanga'n tun thla ni 7 a banna a thehluh chu Larsap in a pawm hnu ah LADC enkawltur (Caretaker) atan Lawngtlai DC a ruat.

Elected Member 25 awmna LADC ah hian MNF Legislature Party a MDC 9 leh anmahni thlawptu BJP, INC, ZPM leh Independent Member pakhat theuh an vaiin MDC 13 ten Governor hnenah Pu V.Zirsanga chuan thlawptu a nei ngah tawk tawhlo tih an thlen hnu ah, Governor ruahmanna angin LADC Chairman chuan Pu V.Zirsanga'n thlawptu a neihdan fiah a nih theih nan LADC Special Session chu March 7 chawhma dar 10:30 ah tanturin a kova. Session tan hma hian Pu V.Zirsanga chuan Chief Executive Member atanga a banna LADC Chairman Pu V.L.Hmuaka hnen a a thehlut a, hemi kalzel ah hian Governor chuan Pu V.Zirsanga banna hi pawmin, LADC thuneihna chu Governor kutah dah in, Lawngtlai DC chu LADC Caretaker atan thla ruk chhung atan Governor hian a ruat ta a ni.

<><><>

PWD & P&E MINISTERS

Public Works Department Minister Pu Vanlalhlana leh Power & Electricity Department Minister Pu F. Rodinglana ten sawrkar flagship programme hnuai thlai thar dah thatna tur atan Zuangtuia PWD, Commerce & Industries leh P&E Department hmunhma an enfiah.

Minister-te hian sawrkar-in Handholding Policy hnuaiia thlai chi hrang hrang pali a dah - Sawhthing, Aieng, Hmunphiah leh Hmarchate chu rei zawk dah thatna tur atan an department hnuaiia hmunhma hrang hrang enfiain, rei zawk dah that dan tur, dry storage leh process a nih theih dan tur te sawi ho a ni a. Thlai dah thatna atan hian hmunhma hrang hrang- PWD Mechanical Sub Division-II Workshop te, Bamboo Processing Factory Industrial Estate-te, Common Facility Centre-te leh P&E department hmunhma hrang hrangte chu tangkai taka hman anih theihna turin an enfiain a ni.

He hunah hian Adviser to CM (Implementation of Handholding Policy) Dr. KC Lalmalsawmzauva, bakah a kaihnawih sorkar department hotu hrang hrang te an tel a ni.



AH&VETY MINISTER

SCERT leh National Council of Educational Council and Training- NCERT huaihawt “Project Vidyasagar, Education Workshop” chu ni 2 chung neih a nih hnuah nimin khan SCERT Auditorium-ah khar a ni.

He workshop hi National Curriculum Framework (NCF) 2023 in a hmalakna tur thar a duante educators ten an lo hriatfiah theih nana buatsaih niin, NCERT hnuaiia National Assessment Centre PARAKH (Performance Assessment, Review, and Analysis of Knowledge for Holistic Development), leh PHD Chamber of Commerce and Industry (PHDCCI) te tangkawpin India ram chhunga a vawi 23-na atan SCERT, Mizoram ah an rawn buatsaih a ni.

He hunah hian Pi Shalini S. Sharma Assistant Secretary General, PHDCCI chuan he workshop a tel tura sawm educator 62 te lawmna thu sawiin hetiang a thawh hona tha tak neih fo hi a tul thu a sawi a. Professor Indrani Bhaduri, Head &CEO, PARAKH NCERT chuan keynote address sawiin, zirna level hrang hrang atana thiam chhuah leh hriat ngaite naupangin an thiam chhuah theihna tura educator te pawimawhia a sawi.



MAMIT ATMA TRAINING

Mamit District a Agricultural Technology Management Agency (ATMA) leh District Fisheries Development Office-te buatsaihin DFDO Training Hall-ah ni 5 kalta chung khan thalai kut hna thawktute tan sangha khawi dan leh enkawl zui dan (fish rearing & management) training kalpui a ni.

Training-ah hian Pi Lalsiamliani, Fishery Demonstrator leh Pu Jimmy Lalbiaktluanga, Fishery Demonstrator te'n dil sawngbawl dan, sangha chi hrang hrang khawi pawlh dan, sangha chaw pek dan, sangha inthlah puntir dan leh sangha khawitute tana hriat tur tul leh pawimawh dangte zirtirna an pe a ni.

Training hi Skill Training of Rural Youth (STRY) hnuaiia buatsaih niin, Mamit District-a thalai sangha khawi lama tui mi Kum 18-40 inkar mi 15- te thlanchhuah an ni a. Nimin khan Pu Rotawma Darlak Zawlpui, dil/huanah-ah field visit neihpui niin, sangha dil puitling tawh sah, len (happa net) zar dan leh thil pawimawh dangte a taka tihpui an ni a.

Training-a telte hi certificate pek vek an ni bawk.



UNION MINISTER LAUHCHED ETHANOL 100:

Union Minister for Petroleum & Natural Gas, Hadeep Singh Puri chuan lirthei hman tur tui alh thei sangbawl danglam ethanol 100 chu nimin khan a tlangzarh.

Union Minister chuan India ramin lei hnuai atanga tui alh thei laih chhuah renchemna atan leh lirthei-in a boruak chhia a siam tih zia awmna atan, sorkar laipui chuan a theihtawp a chhuah zel a ni, a ti a. Ethanol 100 ti a a hming an phuah, tui alh thei, tunlai thiamna hmanga thlai hring up tawih nena pawlh chu boruak chhe zel tur venna kawnga thil pawimawh tak a nih bakah ram dang Atanga India ramin tui alh thei a chawk luh ti ziaawmtu a nih ngei tur thu a sawi a, hei bakah hian Union Minister chuan tuialhthei sawngbawl danglam ethanol 100-a thlai leh hnim tawih hman tangkai a nih avang hian India rama loneitute tan hlawkna nasa tak a nih tur thu a sawi a ni.

New Delhi-a Ethanol 100 tui alh thei tlangzarhna hunah hian Ministry of Petroleum and Natural Gas Secretary Pankaj Jain leh mi sorkar laipui a mi pawimawh thahnem takte an tel a ni.

<><><>